



Broj 17, juni 2009. - vanredno izdanje

Poštovani čitatelji,

VIJEĆE MINISTARA BOSNE I HERCEGOVINE USVOJILO STRATEGIJU PRELASKA S ANALOGNE NA DIGITALNU ZEMALJSKU RADIODIFUZIJU U FREKVENCIJSKIM OPSEZIMA 174-230 MHz I 470-862 MHz

Vijeće ministara Bosne i Hercegovine je na 91. sjednici, održanoj 17.06.2009. godine, usvojilo Strategiju prelaska s analogne na digitalnu zemaljsku radiodifuziju u frekvencijskim opsezima 174-230 MHz i 470-862 MHz u Bosni i Hercegovini.

Strategija određuje optimalno rješenje za brz i efikasan prelazak s analogne na digitalnu zemaljsku radiodifuziju.

Strategija se zasniva na principima promocije razvoja informatičkog društva u Bosni i Hercegovini, podsticanja daljeg razvoja konkurencije i pluralizma sektora komunikacija, stimuliranja stvaranja uvjeta za kontinuiran razvoj medijskih sloboda i zaštiti interesa svih korisnika i operatora u sektoru komunikacija u Bosni i Hercegovini, u smislu nediskriminacijskog pristupa, kvaliteta i cijena usluga.

Usvajanjem Strategije otvara se novo poglavlje u procesu uvođenja digitalne radiodifuzije u Bosni i Hercegovini. Pred nama je period u kojem će se raditi na izradi Akcionog plana za realizaciju zadataka na implementaciji Strategije i uspješnog prelaska na digitalnu zemaljsku radiodifuziju u Bosni i Hercegovini.



AKCIONI PLAN

Nakon Strategije, slijedi usvajanje Akcionog plana i pripreme aktivnosti za početak tranzicijske faze. Nadležne institucije će usvojiti jasno definisan akcioni plan prije početka tranzicijskog perioda, kako bi se na vrijeme provele potrebne procedure. Akcioni plan treba predvidjeti svaku fazu provođenja

Strategije, prije svega usvajanje potrebnog pravnog i regulatornog okvira, određivanje vremenskih okvira, kao i plan subvencioniranja i iskorištenja digitalne dividende.

Uzimajući u obzir opredijeljenost Bosne i Hercegovine ka evropskim integracijama, preporuku Evropske komisije (COM(2005)204), da sve zemlje članice u potpunosti pređu na digitalnu zemaljsku radiodifuziju najkasnije do kraja 2011. godine, kao i dinamiku uvođenja DTT-a u susjednim administracijama, Strategija navodi slijedeće zaključke:

1. U Bosni i Hercegovini će se 01.12.2011. godine u 00.01 sati u potpunosti ugasi analogna radiodifuzija u UHF opsegu IV (470-582 MHz - kanali 21-34) i V (582-862 MHz - kanali 35-69);
2. U uvođenju digitalne zemaljske televizije u Bosni i Hercegovini će se koristiti DVB-T standard sa MPEG-4 (H.264/AVC) sistemom kompresije;
3. Tranzicijski period prelaska na digitalnu zemaljsku radiodifuziju treba biti što kraći;
4. Proces uvođenja digitalne zemaljske radiodifuzije treba se odvijati u fazama gdje jedna prati drugu i koje međusobno zavise;
5. Sprovesti javnu kampanju informiranja i educiranja bh. javnosti o procesu uvođenja digitalne zemaljske (terestrijalne) radiodifuzije, predstavljanja prednosti digitalne televizije, te koraka koji se od građana očekuju u osposobljavanju domaćinstava za prijem digitalnog TV signala u skladu sa zadatim rokovima;
6. Sprovesti subvencioniranje stanovništva prilikom kupovine DVB-T prijemnika. Subvencije će znatno ubrzati proces prelaska na DTT, jer je to efikasan način da se građani potaknu na što bržu kupovinu ovih uređaja. Na ovaj način će se pratiti i penetracija prijemnika na tržištu, što će omogućiti TV stanicama da se prije odluče na digitalizaciju svog programa i pristup multipleksu.

DTT FORUM BOSNE I HERCEGOVINE

Također, Vijeće ministara BiH je na 91. sjednici usvojilo Prijedlog odluke o nastavku rada Foruma o digitalnoj zemaljskoj televiziji Bosne i Hercegovine (DTT Forum) čiji je predlagач Ministarstvo komunikacija i prometa BiH.

DTT Forum Bosne i Hercegovine je stručno tijelo zaduženo za implementaciju Strategije i praćenje procesa prelaska na digitalnu zemaljsku radiodifuziju u skladu sa najboljom evropskom praksom iz ove oblasti. Slični primjeri bliske saradnje resornog ministarstva i regulatora sa stručnjacima i industrijom/operatorima se mogu naći u zemljama pionirima digitalne radiodifuzije (poput Velike Britanije - DigitalUK i Italije - DGTVi), gdje se ovaj model pokazao kao vrlo uspješan.

DTT Forum Bosne i Hercegovine je, do sada, dobio značajne pohvale iz zemlje, regiona i Evrope u pogledu organizacije, rada i rezultata, te je kontinuitet rada DTT Foruma od velikog značaja za uspješnu implementaciju procesa prelaska s analogne na digitalnu zemaljsku radiodifuziju. Nadalje, u Izvještaju o napretku Bosne i Hercegovine za period oktobar 2007.- oktobar 2008.

godine, Evropska komisija je konstatirala da je, između ostalog, uspostavljanjem Foruma o digitalnoj zemaljskoj televiziji (DTT), postignut napredak u audiovizuelnoj politici i medijima.

DTT Forum će u narednom periodu raditi kao stručno i savjetodavno tijelo Vijeća ministara BiH i Regulatorne agencije za komunikacije BiH, te pratiti proces prelaska na digitalnu radiodifuziju kroz koordinaciju sa institucijama zaduženim za implementaciju Strategije i zainteresovanim stranama. Informisanje i edukacija javnosti, te zaštita krajnjih korisnika, uz uvažavanje najbolje svjetske i evropske prakse ostat će i dalje u fokusu rada DTT foruma.

Naime, ideja osnivanja DTT Foruma je zasnovana na zaključcima i preporukama Konferencije „Uvođenje digitalne televizije u BiH”, održane 30. marta 2006. godine u Sarajevu, a zadaci su definirani u Politici sektora emitiranja („Službeni glasnik BiH“, br.18/07 od 13. 3. 2007). U skladu sa zaključcima sa 50. sjednice Vijeća ministara BiH, održane 29. 5. 2008. godine, DTT Forum Bosne i Hercegovine je izradio Prijedlog strategije prelaska s analogne na digitalnu

zemaljsku radiodifuziju u frekvencijskim opsezima 174-230 MHz i 470-862 MHz u Bosni i Hercegovini.

Strukturu DTT Foruma čine: Vijeća DTT Foruma (predstavnici Ministarstva prometa i komunikacija BiH i Regulatorne agencije za komunikacije, koordinatori radnih grupa), Sekretarijat (sekretar i asistent sekretarijata), te pet radnih grupa specijaliziranih za pitanja regulative, programskog sadržaja, tehnika, promocije i društveno-ekonomskih aspekta prelaska na



DTT. U skladu sa novom Odlukom Vijeća ministara BiH, u narednom periodu radne grupe zamjenjuje Stručna komisija.

Podsjećanja radi, Sekretarijat DTT Foruma je započeo sa radom u junu 2007. godine. Odlukom Vijeća DTT Foruma imenovani su koordinatori radnih grupa u septembru 2007. godine. Prvi radni sastanci sa međunarodnim ekspertima za DTT su održani 19., 20. i 21. septembra 2007. godine. Sekretarijat DTT Foruma koordinirao je rad radnih grupa, organizirao sastanke i obezbjeđivao neophodan materijal, sačinjavao zapisnike, te sastavio i uskladio radni materijal prijedloga Strategije.



S ciljem informiranja, edukacije i uključivanja zainteresiranih strana u sektoru komunikacija Bosne i

Hercegovine u proces prelaska na digitalnu zemaljsku radiodifuziju, DTT Forum je organizirao nekoliko konferencija, radionica i okruglih stolova.

Već 20. septembra 2007. održan je okrugli sto: „Uvođenje DTT u BiH“ u organizaciji DTT Foruma / RAK-a i Twinning Light projekta (AGCOM). Nadalje, kako bi se i široj javnosti predstavio projekat uvođenja DTT u BiH,

održana je konferencija za medije 26. septembra 2007. u organizaciji Ministarstva prometa i komunikacija i RAK-a. Bitno je još izdvojiti radionicu posvećenu tehničkim aspektima prelaska na DTT u BiH (17. 4. 2008.), te veoma uspješnu međunarodnu konferenciju u organizaciji DTT Foruma i Regulatorne agencije za komunikacije (22. 5. 2008. i 26. 11. 2008.).



Generalno, DTT Forum je u toku izrade prijedloga Strategije održao preko 100 sastanaka radnih grupa; od toga pet plenarnih, četiri radionice i dvije konferencije, objavio 17 Biltena, te je zajedno sa Regulatornom agencijom za komunikacije sproveo istraživanje u sektoru komunikacija i pokrenuo web stranicu posvećenu procesu uvođenja DTT u Bosni i Hercegovini: www.dtt.ba.

DTT Forum je okupio zainteresirane strane u sektoru komunikacija i intenzivno radio na promociji prelaska na DTT i na edukaciji opće i stručne javnosti. U izradi optimalnog rješenja za Bosnu i Hercegovinu i prijedloga Strategije DTT, Forum je konsultirao priznate međunarodne stručnjaka iz ove oblasti, te aktivno saradivao sa sličnim tijelima u regionu i Evropi.

Prelazak na digitalno terestrijalno emitovanje je neminovnost i obaveza BiH. Iskustva evropskih zemalja ukazuju da je BiH pravovremeno krenula sa izradom strategije i planiranjem prelaska na digitalno emitovanje. Racionalno korištenje resursa, uključivanje svih zainteresovanih strana, dobro osmišljen plan, uspješan rad DTT Foruma BiH i saradnja sa Regulatornom agencijom za komunikacije i Ministarstvom komunikacija i prometa, garantuju uspjeh uvođenja DTT u Bosni i Hercegovini.

